

Headlines

1. प्रधानमंत्री नरेन्द्र मोदी होरें आखेआ जे भारत दा लक्ष्य 2047 तगगर विकसित देस बनाना ऐ। “सुतैंतरता दिवस” पर 12एं बरे दी तरक्की पर लौऽ पाई।
2. जम्मू-कश्मीर च बी 80मां “सुतैंतरता दिवस” देश भक्ति दी भावना कन्नै मनाया गेआ।
3. पंज अफसरें गी ईमानदारी- निश्ठा ते शानदार लोकसेवा तांई मुखमंत्री अवार्ड कन्नै सम्मानत कीता गेआ।
4. ते मुख सचिव होरें आखेआ जे होम-स्टे नीति टिकाऊ सैलसफे गी बढ़ावा देने दा आधार ऐ।

<><><><><><>

PM -Independence Day (Byte)

देस अज्ज अपना 80मां “सुतैंतरता दिवस” मना'रदा ऐ। प्रधानमंत्री नरेन्द्र मोदी होरें दिल्ली दे मशहूर लाल किले थमां देशवासियें गी सम्बोधित कीता। इस मौके पैहली बारी राष्ट्र गीत “वंदे मातरम” गी गाया गया। राष्ट्री ध्वज फहराने दे कन्नै गै 21 तोपें दी सलामी दिती गई ते भारती हवाई सेना दे दंडु Mi-17 हैलिकाप्टरें थमां फुल्ल बरसाए गे। इस बरे दे कार्यक्रम च 2047 तगर विकसित भारत बनाने च युवा शक्ति दी भूमिका पर बल पाया गेआ। राष्ट्र गी सम्बोधित करदे होई प्रधानमंत्री होरें आखेआ जे पिच्छले 12एं बरे च करोड़ें देशवासियें दे संकल्प- समर्पण ते हर मुमकन कोश्ट दी बदौलत देस नै नमियें उंचाइयें गी छूता ऐ। उ'नें गलाया जे पैहले भारत 5 सभ्भनें शा कमजोर अर्थबवस्था आहले देसै च गनोंदा हा-पर हुन ओ दुनिया दी सभ्भनें शा तेजिया कन्नै विकसित होआ रदी अर्थबवस्था ऐ। प्रधानमंत्री होरें गलाया जे 2014 थमां लेइयै अजें तगर भारत तकरीबन 40 देसैं कन्नै मुक्त बपार समझौता करी चुके दा ऐ-जेदे कन्नै भारतीय कारोबार ते निर्यात तांई बड्डे मौके उपलब्ध होआ करदे न। प्रधानमंत्री होरें गरीब ते मध्यवर्गी परोआरें दे बच्चें गी इस्तेहानें लेई मुफ्त ऑनलाईन कोचिंग देने दी घोशणा कीती। श्री मोदी होरें संसद दे राज्य विधानसभाएं च महिला आरक्षण आस्ते सभ्भै सियासी दलें थमां सहजोग दी अपील कीती। नक्सलवाद पर प्रधानमंत्री होरें आखेआ जे देस दे लोकें 2014 च उने'गी देसे दी सेवा करने दा मौका दिता ते उ'नें देसै गी नक्सलवाद थमां मुक्त करोआने दा संकल्प लैता ऐ ते हुन नक्सल ते माओवादी हिंसा अपने खीरी सा लै'रदी ऐ।

<><><><><><>

Prez- NWM Tribute

राष्ट्रपति द्रौपदी मुर्मू होरें अज्ज 80में “सुतैंतरता दिवस” दे मौके पर वीर जोआनें गी भावे-भरोची शरदांजली भेंट कीती। श्रीमती मुर्मू होरें स्मारक पर फुलें दा चक्र अर्पित करियै शहीदें गी चेता कीता। इस मौके पर रक्षामंत्री राजनाथ सिंह, रक्षा राज्यमंत्री संजय सेठ, मुख रक्षा अध्यक्ष जनरल NS राजा सुब्रह्मणिस, थल सेना मुख जनरल धीरज सेठ, नौसेना प्रमुख एडमिरल कृष्ण स्वामीनाथन, वायु सेना प्रमुख एयर चीफ मार्शल अमरजीत सिंह ते रक्षा सचिव राजेश कुमार सिंह होर मौजूद हे।

<><><><><><>

JK I-Day

समूलचे केन्द्र शासत प्रदेश च बी 80मां “सुतैंतरता दिवस” देश भक्ति ते जोश जज्वे कन्नै मनाया गेआ। मुख समारोह श्रीनगर दे बख्शी स्टेडियम च लगा-जित्थे ज्हारें बदे लोक जश्र मनाने लेई किट्टे होए। इत्थें मुखमंत्री उमर अब्दुल्ला होरें राष्ट्री ध्वज चाढ़ेया ते परेड दी सलामी लैती। किट्टे गी सम्बोधित करदे होई मुखमंत्री होरें आखेआ जे पाकिस्तान दे कब्जें आहले जम्मू-कश्मीर दे हालात मत्ते खराब न। उ'नें आखेआ जे आजादी दे 80 बरे परैन्त भी भारत दा हिस्सा बनने दा फैसला सेई साबत होआ ऐ। उमर अब्दुल्ला होरें गलाया जे उन्दी सरकार जम्मू-कश्मीर दे पूरे-पराते ते सामे विकास लेई वचनेबज्झी दी ऐ। जम्मू च उपमुखमंत्री सुरेन्द्र चौधरी होरें एम.ए स्टेडियम च जम्मू च राष्ट्री ध्वज चाढ़ेआ।

<><><><><><>

I-Day-- LG

उपराज्यपाल मनोज सिन्हा होरें अज्ज 80में “स्वतंत्रता दिवस” दे मौके पर लोक भवन च तिरंगा झंडा चाढ़ेआ ते पुलस दी इक टुकड़ी थमां सलामी लैती। राश्ट्र लेई अपनी जिंदू दा बलिदान देने आहलें अनगिनत स्वतंत्रता सैनियों गी श्रद्धांजलि अर्पित करदे होई उपराज्यपाल होरें आजादी लेई होए दे संघर्ष ते बलिदान गी चेता कीता। उ’नें इस बरे कुदरती करोपियें करी जान-मुहाने आहलें नागरिकें गी बी श्रद्धांजलि अर्पित कीती। अग्रे औने आहलियें चुनौतियें गी स्वीकार करदे होई एल.जी होरें वैश्विक नेता दे रुप च उभरने दी भारत दी क्षमता उपपर दृढ़ विश्वास व्यक्त कीता। उपराज्यपाल होरें इस गल्ला उपपर बी जोर दिता जे समावेशी समाज दे निर्माण लेई नागरिकें दा इक जुट होना लाज़मी ऐ। उ’नें प्रधानमंत्री नरेन्द्र मोदी हुंदे नजरिए 2047 तगर आत्मनिर्भर जम्मू-कश्मीर ते विकसत भारत दे सुखने गी साकार करने च हर इक नागरिक दे सक्रिय योगदान दे महत्व उप्पल लौऽ पाई। उपराज्यपाल होरें “स्वतंत्रता दिवस” दी पूर्व संध्या उपपर वीरता पदक हासल करने आहलें जम्मू-कश्मीर पुलस ते CAPF दे सब्भनें बहादुर जोआनें गी मुबारकबाद दिती।



Akashwani Plantation

80में सुतैतरता दिवस दे मौके पर जंगलात मैहकमे ने अज्ज आकाशवाणी जम्मू च रुक्ख-बूहटे लाने आहली इक्क मुहिम दा सरिस्ता कीता। जम्मू दे DFO अशोक कलसी हुंदे निर्देशें अनुसार इस मुहिम च आकाशवाणी जम्मू दी मती थाहर गी कवर कीता गेआ। इस दौरान आकाशवाणी दियां प्रोग्राम हेड रेणु भट्ट ते रेंज अफसर दिनेश जोशी होरें परिसर च मुहिम दी अगुआई कीती।



CM -Awards

जम्मू-कश्मीर सरकार नै लोक प्रशासन च शानदार योगदान ते केन्द्र शासत प्रदेश तांई तनदेयी कन्नै कम्म करने आस्तै 5 अफसरें गी इस बरे लेई ईमानदारी, निश्ठा सराहने जोग कम्म करने आस्तै मुख्मन्त्री अवार्ड कन्नै सम्मानत कीता गेआ ऐ। अवार्ड हासल करने आहलें च Archives, Archaeology ते Museums दे निदेशक कुलदीप कृष्ण Sidha, नमीं दिल्ली च Additional Resident Commissioner जम्मू-कश्मीर सरकार अनिल शर्मा, अमित वरमानी जेड़े सामान्य प्रशासनिक विभाग-4 सरकार दे अतिरिक्त सचिव न। कश्मीर यूनिवर्सिटी दे रजिस्ट्रार प्रोफैसर नसीर इकबाल ते Superintendent Engineer (UEED) जल शक्ति PHE गांदरबल- समी उल्लाह बेघ शामिल न। अवार्ड हासल करने आहले हर जनें गी 51 जहार रुपे नकद ते प्रशस्ति-पत्र प्रदान कीता जाग।



I-Day Distt. (Byte)

जम्मू संभाग दे सब्भै 10 जिलें च 80मां “सुतैतरता दिवस” जोश-जज्बे कन्नै मनाया गेआ। कठुआ च युवा सेवा ते खेडू साइंस ते टैकालोजी मंत्री सतीश शर्मा होरें स्पोर्ट्स स्टेडियम कठुआ च राश्ट्री ध्वज चाढ़ेआ। उ’नें परेड दा निरीक्षण कीता ते शानदार मार्च-पास्ट दी सलामी लैती

मुख्म समारोह रानी सुचेतसिंह स्पोर्ट्स स्टेडियम आराज़ी साम्बा च लग्गा हा। कार्यक्रम दौरान जम्मू-कश्मीर पुलस, Armed पुलिस, ITBP, साबका फौजियें, भारत स्काडट्स ते गाइड्स दे जोआनें दे कन्नो-कन्नो बक्ख-बक्ख स्कूलें दे विद्यार्थियें अनुशासन, एकता ते देश भक्ति दी भावना दस्सदे होई मार्च पास्ट च हिस्सा लैता राजौरी च उत्थुआं दे डी.सी. अभिषेक शर्मा होरें जिला पुलिस लाइन्स ग्राउंड च तिरंगा फहराइयै मार्च पास्ट दी सलामी लैती

पुंछ च जल शक्ति ते जंगलात मैहकमे दे मंत्री जावेद अहमद राणा होरें राश्ट्री ध्वज चाढ़ेआ, इत्थे जम्मू पुलिस, IRP, CRPF, फारेस्ट प्रोटेक्शन फोर्स, NCC कैडेट्स ते स्कूली बच्चे दीयें शानदार टुकड़ियें थमां मंत्री होरें सलामी लैती।

रामबन च जिला प्रशासन नै 80मां “सुतैंतरता दिवस” जिला पुलिस लाइन्स च मनाया। कार्यक्रम च बक्ख-बक्ख स्कूलें दे बच्चें ते मकामी कलाकारें जबरदस्त सांस्कृतिक कार्यक्रम पेश कीते- जेदे कन्नै माहौल देशभक्ति आहले जजबें कन्नै भरोची गेआ

उधमपुर च बी “सुतैंतरता दिवस” देशभक्ति दे रंगे च रंगोइयै मनाया गेआ। मुख् समारोह जागतें दे सरकारी PG डिग्री कालेज उधमपुर च लगा। किशतवाड़ च डी.सी. पंकज कुमार शर्मा होरें राश्ट्री ध्वज चाढ़ेआ। उन्दे कन्नै जिले दे आला अफसर बी मौजूद हे। किट्टै गी सम्बोधित करदे होई डी.सी. होरें जिले च चला’रदे ते मुकम्मल होई चुके दे विकास कम्मै बारे दस्सेआ।

<><><><><>

CS -Home

मुख् सचिव अटल डुल्लु होरें कल सैलसफा विभाग दी इक मीटिंग लोआइयै होमस्टे यानि गृह आवास नीति दी समीक्षा कीती। एहदा उद्देश्य जम्मू-कश्मीर च होमस्टे दे बुनियादी ढांचे दा विस्तार करना- जिनें थाहरें दी अजें तपाश नेंई होई सकी उ’नें सैलानी थाहर गी बढ़ावा देना ते मुकामी समुदाय लेई टिकाऊ आजीविका दे मौके पैदा करना ऐ। मुख् सचिव होरें गलाया जे होमस्टे पर्यावरण दे अनुकूल इक ऐसा मॉडल पेश करदे न- जेड़ा मुख् तौरा पर जम्मू-कश्मीर जनेह संवेदनशील क्षेत्र लेई उचित ऐ। उ’नें जोर देइयै गलाया जे होमस्टे गी बढ़ावा देने कन्नै नां छड़ा सैलसफा क्षेत्र दा विकास होग सगुआ मुकामी लोक बी इस विकास दा हिस्सा बनी सकडन- जेहदे करी समाज दे बक्ख-बक्ख वर्गे च रोजगार दे मौके पैदा होडन।

<><><><><>